

# Il parlament vul distgargiar famiglias cun uffants grev impedids

Las duas chombras federalas èn perina ch'i dovra dapli sustegn finanziel

■ **(sda/anr/vi) Tgi che tgira a chasas uffant grev malsau u grev impedid duai survegnir dapli daners. Suentar il cussegl naziunal ha er il cussegl dals chantuns approvà ier la midada necessaria da la lescha.** La chombra pitschna ha acceptà la proposta senza opposiziun. Ils oratur e las oraturas ha rendì attent a la gronda chargia che las famiglias pertutgadas portan. La midada da lescha chaschunia bain dapli custs. Ma i davenitia anc pli char sch'ìls geniturs na possian betg pli prestar la tgira e stoppian dar ils uffants en in'instituziun.

Ils custs en in'instituziun sajan circa trais giadas pli auts che las contribuiziuns che vegnan pajadas a las famiglias a chasa, ha ditg il pledader da cumissiun *Pirmin Bischof* (pcd/SO). «Pledand stget economicamain e cun cor endiri» saja quai en l'interess da la communitad che las famiglias tgirian a chasa ils uffants.

## Durant 24 uras il di

Ils pertutgads dovrian stima e sustegn per lur lavur, ha constatà *Pascale Bruderer* (ps/AG). Pertutgadas sajan var 2700 fa-

miglias. I sa tractia d'uffants che dovrian per part tractament mintg'ura e quai durant 24 uras il di, ha punctuà Bischof. El ha cità or d'in rapport d'ina grupp da geniturs cun uffants grev impedids.

«Da chapir in tal destin è fitg difficil sch'ins n'ha betg sez fatg l'experientscha tge che quai vul dir», hai num en il rapport. «Per nus na datti naginas dumengias e nagins firads nundir vacanzas per sa remetter.» Cun dapli libertad finanziala posia mintga famiglia decider sezza tge che saja gist e necessari en lur situaziun.

## Fin 2350 francs

Oz survegnan las famiglias tranter 470 e 1410 francs il mais. Il supplement per tgira intensiva vegn uss augmentà. Tut tenor basegn survegnan las famiglias en l'avegnir tranter 940 e 2350 francs. Tar l'assicuranza d'invaliditad (AI) maina quai a custs supplementars da 20 milliuns francs l'onn.

Plinavant datti ina segunda meglieraziun: Il supplement da tgira na vegn betg pli tratg giu da l'indemnisaziun d'assistenza. Quest punct aveva il cussegl fede-

ral refusà. Ord sia vista maina quai ad ina prestaziun dubla. L'AI vegnia plinavant engrevgiada cun ulteriurs 6,5 milliuns francs.

## Custs supportabels

Il minister per socialessers *Alain Berset* ha dentant ditg ier en il cussegl dals chantuns che quests custs sajan supportabels e n'impedeschian betg ils plans da reducir ils daivets da l'AI. Il pledader da cumissiun Pirmin Bischof ha fatg endament che gist las famiglias che hajan il pli da basegn na profiteschian nagut senza questa meglieraziun. Il cussegl dals chantuns è suandà senza cuntervuschs il cussegl naziunal ed ha beneventà la disposiziun.

Auter che l'indemnisaziun d'assistenza n'obligescha il supplement da tgira betg exnum dad engaschar ina terza persuna per la tgira, sco Bischof ha explitgà. I saja per las famiglias pertutgadas era pussaivel d'impunder il supplement per distgargiar ils geniturs sezs per evitar ch'els na davenitian sezs betg anc malsaus dal spir esser surchargiads.